



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :



Tir Yimiyim



tiryimiyim@aolima



tir yimiyim

TAPAK 7

Tottenham-i Dominic Solanke euro million 65 agi alizükogo

Gaza nung civilian tali süogo: Kamala Harris



VOL. XXI ISSUE NO. 300 (ADOK 300)

DIMAPUR TONTONÜ (MONDAY)

LUROI (AUGUST) 12, 2024

₹ 5.00

Assam Rifles-i Aug 9 tatalokba atema sasar

Dimapur, August 11, 2024 (TYO): August 9, 2024 nü Assam Rifles sepai ka aser Angami Students' Union (ASU) President na tsüngda atalokba atema sasa bilemer ta Deobarnü Assam Rifles-i metetdaksüogo. Iba tatalokba atema bushisüngdanga arudang sentry duty nung aliba sepai kati Assam Rifles Camp anasa lenmang nung gari ka anena aliba ngua gariji tonga aoba osang metetogo ta Assam Rifles-i ashi. Independence Day amongtsü anogo atongba ajanga security akangshir aliba mapang ka nung iba ya atalok. Idangji AR sepai aser ASU president tsüngda obang meputep adoka raratep aser sepai jagi gari anisasang

maitsü memetet liasü. Assam Rifles-i Kohima nung alirtem dang iba tatalokba süoki ia bilema bushisüngdang ka tenzükba osang metetdaksüogo. Onoki Civil Administration, Angami Public Organization (APO), Angami Youth Organization (AYO) aser Angami Students' Union (ASU) den iba onük atema jembitepdar ta AR-isa metetdaksü. Iba tatalokba sülen ASU-i August 10 nungi tenzükba Angami nung aliba tesem ajak mokdangtsü sangdonga liasü. ASU-isa paramilitary forces aser talisa Assam Rifles sepaitem Angami nung lushii nung mesenzütsü tetuyuba agüja liasü.

Longchem nung tanur dak tashiyim inyaker ka apu

Dimapur, August 11, 2024 (TYO): Mokochung kübok Longchem nung arishi küm 33 tain tebur kati tanur tetsür ka dak tashiyim agi shi nung medemba atema tai tonglokja puogo. Iba nisung ya Moakaba Aier ta jangjaogo aser August 10 nikongdang 4:00 nungi 4:30 ako meta pai arishi küm 3 tanur ka dak iba mapa inyaka ta osang angazüker. Moakaba ya mapang shia par kidangi arur aser yashi pai tanutsülaji ki tazüng kati anir orr video tamajungtem reprangdaksü aser tashiyim agi shi nung medem ta tanutsüla tebei osangbener dang ashi. Yashi nikongdang tanutsüla kidang maliba agi pai par jala

tantsüla dang tenu bushitsü atema yok aser idangji jala jagi Moakaba aser tenu na ki tazüng nungi adokya aliba angu. Paisa sorkar aser media dang iba tai tonglokja alisang anema obendang ka mangu tashi yariteptsü ayongzükogo. Nokpu Kaketshir Telongjem-i anir Saring aser Mokochung district nung telok balalai iba tatalokba khukhua aitsüba den tai tonglokja alisang ozüng tesashitiba agi merenshitsü takhangba agütsüogo. Pamokisa Moakaba bail nung mechioktsü aser Protection of Children from Sexual Offences Act 2012 kübok pa aitsütsü takhangba agütsüogo.

Thahekhü nung tanur 2 soseter lia angu

Dimapur, August 11, 2024 (TYO): Deobarnep Thahekhü yimtsüng nung tanur ana süngdong ka nung soseta aliba angu. Tenaprong ya Government High School, Thahekhü nung Class 6 kaketshirtem liasü. Tena ya Thahekhü nung kinunger kidang lia aru ta osang angazüker.

Tena ya Thahekhü yimtsüng nung permanent residents masü ta village council züngsem kati ashi. Police-i teinyaktsü ajak inyakba sülen kinunger ket nung tasümgangtem agütsüogo. Police-i tena sosetba kuli metettsü atema bushisüngdang südar.

Centre-i NE nung Doppler radars amenoktsü

New Delhi, August 11, 2024 (Agencies): Centre sorkari Northeast region aser Himachal Pradesh nung X-band Doppler weather radars (DWRs) amenoktsü telemtetba agiogo. Union Minister of State for Science and Technology, Dr. Jitendra Singh-i iba osang ya Rajya Sabha nung metetdaksü. X-band Doppler radars ya Assam nung Guwahati, Dhubri, Jorhat, Tezpur & Silchar, Mizoram nung Aizawl, Nagaland nung Dimapur, Manipur nung Imphal aser Arunachal Pradesh

nung Mandala Top & Namsai nung amenoktsü. Weather Radars amenokba ajanga tsüngsang-mopung dak sendakba osang tajungba asadangtetsü, ta Dr. Jitendra Singh-i ashi. "Centre sorkari alima lendong balala atema renema alitsü aser sensotem nem tsüngsang-mopung shitak takzua osang agütsütsü tenangzükba yur mapa inyaker. Item radars amenokba ajanga India nung meteorological infrastructure akangshitsü" ta paisa ashi.

Pungro nung alirtemi GPRN/NSCN (IM) nem mapang züngzüktsür

Dimapur, August 11, 2024 (TYO): August 8, 2024 nü Pungro jila nung GPRN/NSCN-IM züngsemtemi GPRN/NSCN (Kitovi) züngsem ana züka merenshiba atema Yimkhiung nung loktitentet aser tanishirtem rondak senden ka menogo aser Yaruwo, GPRN/NSCN (IM) GHQ-Hebron, Nagaland dangi shidi ka zülüogo. Parnoki Pungro Sub-Division public aser Yimkhiung nung tenüng nung Public Ultimatum ka agütsüogo aser iba nung ghonda 72 tsüngda Capt. Jangkhen aser Sgt. Major Jusulen na mapa nungi anentsütsü mapang züngzüktsüogo. Public-i akhangba ama meinyakra Yimkhiung nung ajaki teinyaktsü inyaka aotsü ta parnoki Yaruwo, GPRN/NSCN (IM) dang shiogo. Iba anogo GPRN/NSCN (Kitovi) züngsem ana- Sangtikiu aser Ati na ya Yimkhiung nung

lir aser GPRN/NSCN-IM Town Commander Capt, Jangkhen den yariteperitemi tena züka merenshi. Mangatettep aliba ken o tem timi angatetteptsü melena tena dak prangpong agi tuita yur kanga mejungi züka merenshi. Iba ola angashir kiyongertem ao saka parnok-a prangpong agi amokmeren aser iba osang shinga danga mashitsü tetuyuba agütsü ta Yimkhiung Tribal Council (YTC), GB's Union Pungro sub-division (GB's UPSD) aser Public Forum Pungro Sub-Division (PFPSD) teloktemi metetdaksü. Iba osang angashia CSO tanishirtemi town commander den jembitsü tongtepratep saka pai meyper amokmeren ta parnoki ashi. Yimkhiung nung pelatepa Metümnyo benjung amongba mapang iba ya atalok. Tesüba nunga Capt. Jangkhen-i kaketshir lennirtem, kija aser shishilembartem amokmerena

aruogo aser iba ajanga tensa mejungi kümdaktsü ta Yimkhiung CSOs-isa ashi. GPRN/NSCN (IM) Town Commander Capt, Jangkhen-i inyakba mapa ya December 18, 2007 nü ENPO bangzüng anema lir, kechiyong ENPO telongtet nung azü tokshiba, amokmerenba, merenshiba aser ozüng alema inyakba magizüktsü lateta lir ta parnokisa ashi. Iba senden nung Yimkhiung Tribal Council (YTC), Public Forum Pungro Sub-Division (PFPSD), Yimkhiung Youth Organization (YYO), Yimkhiung Akherü Arihako (YAA), Yimkhiung Liberü Arihako (YLA), GBs Union Pungro Sub-Division, Pungro Town GBs, Pungro Area College Students' Union (PACSU), Pungro Town Students' Union (PTSU) aser Pungro town nung Ward Chairmen & Secretaries ajak aden.

Bangladesh interim government-i süoki ia bilemba metetdaksü

Dhaka, August 11, 2024 (Agencies): Bangladesh nung Prime Minister Sheikh Hasina atsüngdokba sülen Hindu nung aser tanga tamangba yimsütem amakba azüoktsü meranger ta Deobarnü interim government taseni metetdaksüogo. Muslim nung teimba ser aliba Bangladesh linük nung nübo teimba aliba tamangba yimsü tanabuba Hindu nung lir aser parnok ya Hasina'er party Awami League pusemertem ta züngshir. Hasina-i ajungbena Prime Minister menden yutsür linük toktsür aoba sülen Hindu nung ki, tekülemdak aser dokantem amakba osangtem aika angazüker. "Tesem kar nung nübo kanga ajema aliba tamangba yimsü amangertem amakba atema onoki süoki ia bilemer. Onoki yimsüsürtem aser sendaktepa aliba telok tanishirtem den senden ka amentsü" ta interim cabinet-i tanü ashi. Bangladesh nung democratic temelenshi bener arutsü atema shimba "council of advisors"

ajanga tanü tongtipang teinyaktsü aika metetdaksüogo. "Hasina anema lungkak aityonga arudang taküm samaba kibongtem yariang" ta Nobel peace prize angur Muhammad Yunus-i aniba interim government-i tetuyuba agütsüogo. Taküm July ita nungi mepetmesü adokdang yirurtem aser tasür 450 tema nem sorkar senpong nungi teyari agüjang ta parnokisa ashi. Deobarnü Bangladesh Supreme Court nung Chief Justice tasen kati tezüngzüktep agiogo. Taoba Chief Justice Obaidul Hassan-i Hasina den tesentaktep yur lai ashiba ama dang inyaka aru ta kaketshirtemi aija pa mapa nungi anentsü takhangba agüja liasü. Supreme Court nung Chief Justice inyaktsü atema Syed Refaat Ahmed-i tezüngzüktep agi. Pa ya University of Dhaka, Oxford aser Tufts University, United States nung azüngba nisung ka lir. Arishi küm 84 tain Yunus

taoba Brihostibarnü Europe nungi Bangladesh-i aru aser pai lenisüba kübok interim government tentetogo. Yunus-i 2006 nung Nobel Peace Prize angu aser iba ya pai microfinance nung mapa tajung inyakba atema agütsü. Yunus-i Bangladeshi nung million aika sensaktia nungi anitetba atema züngshir. Pai interim government nung "chief advisor" ama inyaker aser iba sorkar nung civilians bar retired brigadier-general ka dak alaka civilian tem dang shimoka lir. "Hindu nung amakba ya tesempatsü mapa ka lir aser aitsür. Parnok ya iba linük nung sensotem masü na? Nenoki (kaketsirtem) iba linük kümzükogo, anungji kibong kar meküzmükttetsü asü?" ta Honibarnü Muhammad Yunus-i ashi. "Shingaia parnok meyrudaktsütsü. Parnok ya ozü adianutem lir, onok külemi rara aser külemi alitsü ta kaketshirtemi ashitsüla" ta Yunus-i Begum Rokeya University nung kaketshirtem dang ashi.

Nagaland-i Bangladesh tensa atema renema lir: Y. Patton

Kohima, August 11, 2024 (TYO): Deputy Chief Minister & Home Minister Y. Patton lenisüba kübok Civil Administration aser Police Department-i Bangladesh tensa atema teinyaktsü shitak inyakdar. Bangladesh nung tensa ajuruba ajanga ozüng alema arurtem Nagaland-i marudaktsütsü atema

district ajak nung Deputy Commissioner tem dang District Security Co-ordination Committee tentettsü tetuyuba agütsüogo ta Media Cell, Dy.CMO-i sangdong ka nung ashi. Nagaland nung Deputy Commissioner ajak dang arrtsülen kanga junga anüktsü aser Assam ketdangsurtem den

amalitepa mapa inyaktsü tetuyuba agütsüogo ta Media Cell-isa ashi. District Administration aser Police -i anir state sorkari iba tensa atema mapa inyakdar. Yimtsüng ketdangsurtem, civil society organisations (CSOs) aser public teyari ajanga kechi ajurudir ajuruaka inyaktsü renema lir ta parnokisa ashi.

LKMRCC ajanga tzükong lenmang semdang



Dimapur, Luroi/August 11 (TYO): KKB Rülho Construction Company ajanga Langpangkong ajangba NH-02 two lane yangluba nung nüburtim timtemdaksüba den külemi mapa inyakyim jangramatem ajiteta Langpangkong Kaketshir Mungdang (LKM) aser LKM Road Coordination Committee (LKMRCC) ajanga Company den aiben jembishinüa arur July 30, 2024 tashinung tim mapa inyaksü Deputy Commissioner, Mokokchung nem nungloksü aser mangara longkak aittsü shia liasü.

Iba dak sendakba nung DC Mokokchung-i July 29 anogo DC Conference Hall, Mokokchung nung meeting jatepba August 8, 2024 tashi meshizük aser August 9 anogo

nung külemi lenmang reprangtsü lemtet.

Iba dak sendakba nung August 9, 2024 nü LKM Office, LKMRCC, PWD (NH) Dept., Authority Engineer aser KKB Rülho Construction Company külemi Unger nungi Tuli Tzüsangra tashi reprangranga senzü.

Parnok yamaji senzüdang tesüiba mapang dang nungi temelenshi tuluba ngua LKM-i pelaba lemsatep.

Saka ano inyakyim aika nung tim masüba mapa ngua Naga nungeri Naga lima meraksatsüla saka yanglushitsüla ta ajungshitep.

Iba den repsema lokti balala ajaki temelenshi asoshi amaletpba aruba ngua LKM temulung ulur aser pelar saka kodamasü tentet kari danga iba

lenmang inyakba nung tim masüba inyakyim ajanga meinprong agütsüra kaketshir mungdangi tapet mera agitsü, anungji mapa tekeraba aser tajungtiba nung inyaksüla ta Company ajungshia liasü.

Anungji, tim masüba inyakbatem tekeraba nung metongshia yanglushitsü Mungdang ajangsa metetdaksü aser item temelenshi mongura aser maneni tarutsü nung tim masüba mapa inyakra LKM ajanga osang kicha magütsüi mera agitsü ta LKM tir Imlinok ajanga Company, Authority Engineer aser department ajak lia ashi.

Mokokchung Deputy Commissioner nem July 26 nü shity agüja aliba ya iba mapa matem tashi takum alitsü, ta nemshia metetdaksü.

Akato Chophi-i asükhu lemsatep

Dimapur, Luroi/August 1a (TYO): NSCN President, Akato Chophi-i sangdong ka ajanga, Nagamese films nung nüngtugu nisung aser medemer asür Nihovi Achumi August 9 nü asüba osang angazüka mang ayimba lemsatepogo. Nagamese film nung pai "My Blood For The

Nation" film amala nung tongtibang shilem agiogo.

"Ni DDYO (Dimapur District Youth Organisation) tir asüba mapang pa Joint Secretary liasü," ta Akato-i ashi.

Pa ya Naga nunger rongnungi nüngtugu Martial Artist ka aser lanur lenir ka dang

masü, saka ajak atema medemer tajung ka liasü, ta pai ashi.

Tulusang Tsüngremi pa tanüla teti tatem makadak anisüngzükdakjang ta aser par kinungertem nem mangyim jashi khuret koktettsü atema tashi agüjang ta sarasademtsür, ta paisa shisem.

Akashvani Kohima-i Musical Fiesta ayongzük



Dimapur, Luroi/August 11 (TYO): India indang 78 buba Independence Day nüngtem nung Akashvani Kohima ajanga state Academy Hall, Kohima nung Honibar nikonngdang 'Musical Fiesta' sentong ayongzükka liasü.

Nagaland nung kin 15 nungi ken aser sobaliba yimya balala ajanga nüchiso aser telungjem tushia iba sentong ya agia liasü.

Iba sentong nung tesemdanger tongti ka ama Director General of Police Nagaland, Rupin Sharma-i

jembidang kin balala indang ken ya alimai angateta amshitsüsa meyipzüksü junger, ta ashi.

Yamaji inyakba ajanga state nung employment atema maongka tali adoktsü, ta pai ashi.

Naga nunger ya nokinketer ta ken ajanga ashiba dang masü saka Naga nunger dak yimya tajung aliba nüburtemi sangdongtsüla, ta DGP-i ashi.

Nagaland indang sobaliba ya state telungzük nung kistung masü saka region ajunga, lintük aser alima nunga prokshitsüla,

ta Sharma-i ashi.

Assistant Director, Akashvani Office of the ADGP Content Guwahati, Aseem Qazi-ia Naga nunger ken ya international sapangi bener aotsü nüngdaker ta ashi.

Iba sentong nung DGP Band, Colour Keys aser Moko Koza ama nüngtugu kentener temi shilem agia liasü.

Iba sentong nung Akashvani Kohima ajanga nungloksüba ama "Gift a radio campaign" nung tajungtiba video upload asüba atema sempet agüja liasü.

Manipur nung Kuki nunger ex-MLA ka kinungtsü pokset

Imphal, Luroi/August 11 (Agencies): Manipur nung Kangpokpi district kübok Kuki-Zomi nungeri amokbanga alidak taoba Saikul MLA Yamthong Haokip'er kidang bomb ka apokba nung pa kinungtsü Charubala Haokip asü.

Arishi küm 59 tain Charubala Haokip ya Meitei kin nungi lir, aser Kangpokpi district kübok Ekou Mulam nung lar kidang jana arongba mapang local made IED ka poka yiruba zübu agi la asü.

La dak alaka iba lendong nung dangar asü-amaba meliasü aser iba tatalokba osang ajanga region anokshitsü.

Kuki kin nungi Yamthong Haokip ya taoba mapang Congress legislator liasü aser 2022 küm BJP dangi meyip, aser

pa iba lendong nung meyiru.

Police temi ashiba agi iba lendong ya Hokolbar nikonngdang 3:00 ako meta atalok saka Honibarne ang osang sangdong. Iba kidang jana nung local made IED yuja liasü, ta police-i ashi.

"Charubala Haokip ya jana arongba mapang bomb ya apok. Tanungba nisung ajak shidak lir. Dangar asü-amaba mesüra yiruba mali," ta police ketdangsur kati osangbener dang ashi.

Dangar den mangatettep kar adokba ajanga iba lendong ya agütsü südi ta temulung meleni lir aser iba tatalokba bushisüngdang tenzükogo, ta ashir.

Ajisüaka tang tashinung nisung kata pua mali.

25th Hornbill Music Festival atema TOYOTA aser TaFMA tsüngta MoU zülutep



Kohima, Luroi/August 11 (TYO): Aruya aliba 25th Hornbill Music Festival 2024 nung külem sür inyaksü atema TOYOTA aser Task Force for Music & Arts (TaFMA) Nagaland tsüngta Memorandum of Understanding (MoU) ka August 8, 2024 nü

Kohima nung zülutepa liasü.

Iba MoU nung Dr. Hovithal Sothu, Project Director TaFMA aser Holo Chishi Swu - HoD Okusa Toyota nati Okusa Toyota Managing Director Vikheho Swu aser TaFMA chairman Theja Meru nungertem lia meyongnem agüja liasü.

2nd Kalyan Barooah Memorial Awards atema entry meshir

Dimapur, Luroi/August 11 (TYO): Asür Barooah asoba anogo den indangtepa December 11 nü 2nd Kalyan Barooah Memorial Awards agütsüba sentong ayongzüksü, ta North East Media Forum aser My Home India ajanga sangdong ka nung ashi.

2021 küm COVID mapang osangbener tejen Kalyan Barooah asü, shiba New Delhi nung aliba The Assam Tribune nung North East correspondent liasü.

North East Media Forum ajanga Press Club of India den lungjemer May 1, 2022 nü asür Barooah bilemteta senden ka amendang My Home India social organisation tentetsang Sunil Deodhar-i Asür Barooah tenüng nung North East India nunger osangbener tem atema My Home India ajanga award sentong ka ayongzüksü ta sangdong.

1st Kalyan Barooah Memorial Awards sentong ya December 11, 2023 nü Constitution Club, New Delhi nung ayongzükka liasü.

Yamaji 2nd Kalyan Barooah Memorial Awards 2024 atema category balala nung nominations meshir, ta sangdong ajanga ashi.

Kalyan Barooah Memorial Award atema shimer ya Northeast region nungi India tesem balala (region telungzük

mesüra dangalen) inyaker aser linük tesem balala nungi osangbener shirnoki region indang osang abener, parnoki category pezü nung apply sütettsü.

Category pezü ya Print/Digital media, Electronic media, Still Photographer aser Videographer alitsü.

Iba entries atema arishi küm telatet mali.

North East Media Forum nungi tejangja nisung temi Lifetime Achievement Award atema shimtsü aser parnoki item entries nungi shimtsü.

Applicants temi parnok indang byline stories scanned copy tem mesüra certified video clips tem den application agütsütsüla. Scan süa aliba video clip shia publication/channel tenüng, publication/telecast anogo aser oshi tejangja agütsütsüla.

English masü danga oshi nung lira, tongtipang shilem English oshi nung meyipzükka agütsütsüla, ta ashi.

Applicants temi pei indang bio-data aser pei inyakba indang ID card den address, mobile number aser email id tejangja agütsütsüla.

Application ya September 30, 2024 tashinung agütsütsüla aser entries ya email id: northeastmediaforumofficial@gmail.com nung yoktsüla, ta sangdong ajangasa ashi.



August 11, 2024 nü Ranchi nung Bangalee Yuva Mancha Charitable Trust (BYMCT) züngsemtemi Bangladesh nung Muslim nungertemi Hindu nungertem amakba anema longkak aيتدang tangokba noksa nung angur.

Tir Murmu-i Fiji, New Zealand aser Timor-Leste linüktem semdang

Delhi, Luroi/August 11 (Agencies): Tir, Murmu Droupadi-i linük asem- Fiji, New Zealand aser Timor-Leste semdangba sülen Amongnü India-i meyipa aruogo.

Linük asem denji tesendaktep tajungba akümtsü nükjidadong nung lai item linük semdang.

Lai tesüsa Timor-Leste semdangba mapang nung lai iba linük nung Tir, Jose Ramos-Horta den onük aika nung o lemtepa lenla balala nung amalitepa inyaksü atema jemb.

Ministry of External Affairs otongdar, Randhir Jaiswal-i X ajanga, "Tir Droupadi Murmu @rashtrapatibhvn-i Timor-Leste semdangogo, aser ibaji ajanga linük ana tsüngda tesendaktep

tajungba akümtsü. Tir @JoseRamosHorta-i airport tashi Tir Murmu meinokja liasü," ta metetdaksü.

Murmu nem Timor-Leste indang tematiba civilian award Grand Collar of the Order of Timor-Leste agütsü. Tir Ramos-Horta-isa Tir Murmu nüngtem nung Palacio Nobre De Lohane nung chiyung sentong ka ayongzuka liasü.

Tir Murmu-i, kobi melii Dili nung Indian Embassy lapoktsü, ta metetdaksü.

New Zealand nung lai Governor General, Dame Cindy Kiro, Ato kilonser Christopher Luxon aser Deputy Prime Minister Winston Peters nung den senden mena linük ana tsüngda tesendaktep ano

tajungba akümtsü atema jembia liasü.

New Zealand semdangba mapang nungsa Murmu-i, New Zealand den tesendaktep ano tajungba akümtsü aser yangji aliba India nungersensotem asoshi Auckland nung Indian Consulate ka amenoktsü, ta sangdonga liasü.

Fiji semdangba mapang nung lai Tir, Wiliame Maivalili Katonivere aser Prime Minister Sitiveni Rabuka na den senden amen.

Fiji nung Murmu nem linük nung tematiba civilian award, Companion of the Order of Fiji agüja liasü. Murmu-isa Fiji Parliament nung o jembia aser yangji aliba India nungertem ajurua liasü.

APOLLO HOSPITALS CHENNAI, NEUROSURGEON DR. VIGNESH SAYEERAJAN VISITING DIMAPUR ON 22ND AUGUST, 2024.

Patients suffering from Fits, Seizures, Slip Disc, Brain Tumor, Cerebral Stroke, Back & Neck Pain, Endoscopic Spine Surgery, Facial Pain, Stiff Back, Cervical and Lumber Spondylosis may come for OPD Consultation only.

For prior appointment please visit:
Apollo Hospitals Information Centre, NL Road, Opp. Police Asstt.Booth, below foot Bridge, Dimapur or call on 7005092021/9366994839.

Maldives ya India atema kanga tongtibang partner ka: S Jaishankar

New Delhi, August 11 (Agencies): Amongnü External Affairs Minister (EAM), S Jaishankar-i, Indian Ocean Region nung Maldives ya India atema kanga tongtibang partner ka lir, aser linük anapronglai amalitepa inyakba nungi jenjang tajungba kuma tesendaktep yangluner, ta ashi.

Jaishankar aser Maldives Foreign Minister, Moosa Zameer na Addu Reclamation and Shore Protection Project sentong aser 4-lane Detour Link road project tenzükba sentong nung adenba sülen Jaishankar-i, "Maldives ya asenok atema Indian Ocean region nung tongtibang partner ka lir. Iba linük ya asen mapatong Neighbourhood First policy nung densema lir. Anungji asen linük ana tsüngda amalitep jenjang nungi partnership jenjang tashi ajungkettsüji linük anaprongla tejangraba lir," ta metetdaksü.

Tesüiba kum ishika tsüngda India-i Maldives nung dollar sen million 220 shi indokogo, aser ibaji ajanga India-i Maldives nung terenlok atema temelung agütsüba sayur, ta pai metetdaksü.

"Tanübo shishilembaba tsütsü partners tulutibatem rongnung Maldives densema lir. Iba dak alia India-i Maldives nung, talisa tourism sector nung invest asür," ta paisa metetdaksü.

Addu Reclamation & Shore Protection project atema India-i Maldives sorkar den longjemer inyaker. Iba project atema ali hectare 184 nguogo. Iba project nung dollar sen million 80 indoktsü aser iba project ajanga region nung mapa, entrepreneurship aser shishilembaba tsütsü maongka tasen aika agütsütsü.

Jaishankar-i, "Onoki project 65 atema longjemer inyakdar aser iba nungjagi project 12 bo renemogo," ta metetdaksü.

Taoba mapang External Affairs Minister, K Natwar Singh süogo



August 11, 2024 nü New Delhi nung taoba mapang Union Minister, K. Natwar Singh mangjak nung kinüngertemi asür nem akhüm agütsüadang tangokba noksa nung angur. Natwar Singh mapang talangka shiranga aruba sülen Honibar aonung süogo.

New Delhi, August 11 (Agencies): Taoba mapang External Affairs Minister, K Natwar Singh mapang talangka shiranga aruba sülen Honibar aonung alima nungi pilaogo, ta par kinüngertemi metetdaksü. Pa arshi kum 93 liasü.

Pa Delhi anasa Gurugram nung aliba Medanta Hospital nung temongdak mapang asü. Iba hospital nung pa hopta ana shi mongogo.

Singh ya 1931 kum Rajasthan kübok Bharatpur district nung aso.

1984 kum pa nem Padma Bhushan award agüja liasü.

Honibar aonung par kinünger kati, "Hospital nung par jabaso lir aser pa asüpila sentong nung adentsü atema par kinünger aika Rajasthan nungi Delhi-i arudar. Pa mapang talangka temang mejungi liasü," ta metetdaksü.

Taoba mapang Congress MP, Singh ya 2004 nungi 2005 kum tashi taoba mapang Ato kilonser, Manmohan Singh-i aniba UPA sorkar nung External Affairs Minister liasü.

Pa Indian ambassador to Pakistan-a inyaker 1966 kum nungi 1971 kum tashi Prime Minister Indira Gandhi indang office nung inyaka liasü.

2006 kum Congress-i pa party nungi anentsüba sülen pai Bahujan Samaj Party (BSP) nung aden saka BSP-ia ita 4 tsüngda party nungi pa agiena liasü.

Pa asüba osang angashia yimtenren lenir tain, Randeep Surjewala-i Hindi oshi agi X ajanga, "Taoba mapang Foreign Minister Natwar Singh asüba osang angashia jashir. Iba takoksa tizüktettsü atema par kibong züngsemtem nem tashi agüjang aser asür tanela tesünep nung anisüngzükdakjang ta sarasademsür," ta lemsatsep.

Randeep Surjewala-isa social media nung Singh indang noksa-a ka lemsatsep.

Singh-i 'The Legacy of Nehru: A Memorial Tribute' aser 'My China Diary 1956-88' na densema kaket aika züluogo.

2016 kum pai pa takum otsü 'One Life is Not Enough'-a züluo liasü.

Sorkari Bangladesh nung Hindu nungers kumzüksüla: Vikramaditya Singh

Shimla/Dhaka, August 11 (Agencies): Himachal Pradesh nung Public Works Department (PWD) Minister, Vikramaditya Singh-i Centre sorkar dang Bangladesh nung Hindu nungertem kumzüksü atema tangsa mera agia inyaksüla, ta takhangba agütsü.

Pai Ato kilonser Narendra Modi dang tiyongtsüü ia inyaksü mepishi.

Vikramaditya-i, tang Bangladesh nung nisung jenti tepsetdar aser Hindu nungers tekülem kitem raksatsüdar, anungji Bangladesh nung Hindu nungers temeden aser akhümket kumzüksüji India sorkar mapa teinyaksü mapa lir, ta metetdaksü.

Paisa, Bangladesh nung nütüsung ajema aliba Hindu nungertem amakbaji sorkari aitsütsüla aser takoksa angurtem nem teyari agütsütsüla, ta mepishi.

Amongnüa Bangladesh yimtiba, Dhaka densema Chattogram, Barisal, Tangail aser Kurigram yimtittem nung Hindu nungers meyirjang aika adenshia, Bangladesh nung alitsü atema Hindu nungers temeden lir, ta metetdaksü.

Longkak aiteritem jagi Honibar nungi tenzuka Dhaka nung Shahbagh intersection mokdang longkak aيتدar. Bangladesh nung Sheikh Hasina-i aniba sorkar atüngdokba sülen Muslim nungertemi linük tesem balala nung kiojen aser Hindu

nungers tekülem ki aika raksatsüogo.

Longkak aiteritem jagi "August 2024: Bangladesh nung Hindu nungertem kumzükang. Onoki ochi temeden aser tekumzükba aginer", "Hindu nungers kumzükang", "Kechiba tekülem kitem aser kiojentem nungi auyar? Onoki telangzüba aginer", "Nüchiso linük Bangladesh nung reshikangshi maneni malitsü", "Yimsüji nija temeden saka linük yabo ajak meyong" ta ozülu balala amer longkak aita liasü.

August 5 nü Hasina-i aniba sorkar chirepba sülen Bangladesh nung district 52 nung Hindu aser Khristantem densema minorities anema inyakba tatalokba 205 lir.



Independence Day atongtsü anogo ishika dang lia August 11, 2024 nü Red Fort, New Delhi nung iba anogomong sentong atema sabang yangludang tangokba noksa nung angur.



TIR YIMYIM YIMOBILEM (EDITORIAL)

DIMAPUR TENTONÜ, AUGUST (LUROI) 12, 2024

Jenang matutsüla masü akümtsü!

Asenok atema taaktsü mapa kaji tang Mariani-Mokokchung lenmang majungba ajanga Mariani nungi dokan khu abenba gari matuba ya asütsü. Atangji, ibaji takoksabo asenok asoshi dang masü saka parnok Mariani nung gari kiburtem asoshia takoksa tular lir, kechiyong Mariani nungi Mokokchung tashi dokan khu bener tutsüba gari taa parnoka tangbo mangur. Aji oda, asenoki khen bilemstübo Mokokchung tashi atutsüba lenmangji mejungra, iba yariji gari taaji meshir atu nunga parnokang tajangzük angutsüba ser nung ta bilemer. Ajisüaka, Mariani nung alir gari-temiang, tanga kuli agi masü, Mokokchungi atutsüba lenmang majungba agi lenmang meyanglu tashi Mokokchung-i matutsü lemtetba jagi asenok atema asen lima nung teinyaktsü wadang ka sayuogo. Ano külen, joko Mariani len nungi jangotsü aser nungdak osettem matuba agi Mokokchung town nung shishilembartemi jenjang tur ayokba jagi asen lima rongsen jenjang aser asen nübortem tangatetba sayur. Mokokchung Chamber of Commerce & Industry (MCCI)-i ashiba ama, ibai nübortem jangotsü nung sen tur ayoktsüba mapang masü saka akok tashi nübortem timtem meteta yariteptsüba mapang lir. Alima tanabuba tongpang rara mapang, France lima nung temeim aketba aluyimer takar ka liasü. Pai nübortem timtemba ngur pai parnok nem jangotsü angatisa agütsüba ngur, idangji nisung kati pa dang jangotsüji sen tur ayok nungbo pa tajangzük tulu angutsü ta ashi. Ajisüaka, pai pa dang 'ibai asen nübortem dang chiyongtsü nung sen tur ayoktsüba mapang masü saka angati lema agütsütsüba mapang lir', ta langzük. Tanü ama asen limai jangotsü peria bener marutetba mapang ya, asenok Mokokchung nung alirtem asoshia jenjang tur ayoktsüba mapang masü saka angatisa mesüaka mesüra jenjanga majemyonga, jenjang tatubo metui nübortem dang nungi jenjang shitak agia ayoktsüba mapang lir. Aji oda, tayokertem asoshi dang masü saka tang ama jangotsü talubo manguba mapang nübortemia alima tensa tia meteta chia ajemba nung akhidang dang nungi tilaba aser tajemba chi ajemtsü meteta inyakra, Mariani len nungi jangotsü bener meyokbaji asenok asoshi tajangzükang asütsü. Atangji, lenmang majungba agi gari matur aser gari matuba agi tzümalen nungi jangotsü aser asen nungdak oset kecha matur. Tanü putu nung tangar dang yamaji ashi nungbo, tangaribo mamangtsü, kechiyong Nagaland adenerbo tanga state-tem lenmang nungbo gari ti dak tali kenyongi külemi oli aruli jajatetsüsa lemang tulu tesadem yanglua lir. Item lenmangtemji kasa National Highway-tem, anungji oagilen tanga state nung yangluba National Highways o asen lima yangluba Highways na kasa dang, kasa government-i kasa senotsü lemzükja inyakdaksür. Ajisüaka, asen limabo majung saka pi pur bendanger limabo lenmang süsüba agi gari koba tashika karaa aoer ajia mejangjatet, tzüim nung rong nung mener aoer amai tatashia matashi gari nung mener süngo jema computer nung office mapa inyaka jajar. Ajisüaka, asen lima ajangba National Highway 2 nung dena gari mejajatetsüsa lenmang yanglurtemi mapa majet mashi mashi inyakba agi aiben tadongtsüka mapang shitak nung metongtet timtem takoksa angudang jashir aser tangar tsüngdang asen lima agi nümamedangtet bilemer. Iba amaisa asen lima nungbo National Highway dena repranger mali amai küma odaktsüra, asenoki dokantem nung jenjang metudaktsünüyonga asen lima nung jangotsü aser kisüjensüba osettem nung sen jenjang khen nung onketa tur ayoktsü mapang ka arutsü. Kechi ayokertem südirsiüaka, tayoker shingai pei akoksar jenjang tajemba nung mayoktsü, anungji khu abenba gari jajaba lenmang mejungra jangotsü aser osettsüset nunga jenjang atutsüsa akümtsü, kechiyong gari taa atutsü. Item ajakji talir aser tachi tajemertem dang nungiang mesükzüksü. Iba ama asenoki asenoksasa yangluba timtemtsü tensa tia ka majuru dang, tang putu nung yabo Ao lima nungbo gari lenmang majungba agi gari mesenzüteter ta asütsüsabö matalokdaktsütsüsa asenok yimsüsürtemi khuret abentsüla aser nübortem daka wainshin alitsüla.

OLEMSABANG

NAGA NUNGER LANURTEM-IA SAISAPONG NUNG MONGIN KÜMA ASAYATSÜLA

~ L. Kika Pongener

(Yashi adok nungi...)

India lima nung Industry-tem aser Company-tem reprangdanga ora, rongsenkettzüng nung takar aika lir, aser item rongnung "Board of Control for Cricket in India" (BCCI) aser "Indian Cinema & Film Industry"...iba ana ya takatiba asütsü sudi. Sorkar den sakü item Industry & Company-temi nisung aika nem Employment agütsür aser sorkar atema nukdang tajung ka-ka lir. Tanü putu nung sai-sapong (Games and Sports) aser jiloshi (Acting) ya kanga tongtipang mapa ka kümogo. Anungji lanurtemi iba ana nung ya temulong kanga agütsütsüla. Manipur State nungi Boxing asayar 'Mary Kom' la ya yimtsüng tilaka, aser sensaker aluyimer kibong ka nungi, saka International level tashi nung Boxing asayaba nung Medal anguba ajanga tanübo alima nung nungtuko kümogo aser takar tetsüdi kümogo. La nem Manipur sorkar-i Police Department nung Deputy Superintendent of Police (DSP) rank tashi agütsüogo. Ano la ya tang Raja Sabha nung Member (MP) lir, aser ano la nija meyong 'Boxing Academy' lapoka lir. India nung nungtuko Crikete asayar Mahindra Singh Dhoni Crikete junga asayaba ajanga alima nung nungtuko kümogo aser pa nija meyong 'Crikete Academy' lapoka lir, aser pa Indian Army nung rank tulu nung aniokogo. Ano Crikete asayar mongin Sachin Tendulkar alima nung nungtuko aser takar kümogo aser pa-a tang Rajya Sabha nung Member (MP) lir. Aji oda, sai-sapong nung mongin küma asayaba ajanga sorkar dak memetaloki, pei taküm/kibong mesua alir India lima nunga asayar aika lir. Ano akoker-ibo jiloshi (Acting) nung mongin 'Actor' akümtsü merangtsüla, aser Indian Cinema & Film Industry nung shilem agitsüsa jenjang tongtettsü merangtsüla. Tanü putu nung Actor & Actress-tem ya nungtuko nisung dang masü saka takar-tem aika dang lir. Aji oda, jiloshi (Acting) nung dang ajungba agi nungtuko akümba aser takar küma alir India lima nunga Amitha Bachan aser Sharukh Khan nung ama aika lir.

Tanü alima nung, saisapong nung nungtuko sua asayar rongnung, Argentina nung Foot ball asayar Leonel Messi aser Portugal nung Criatiano Ronaldo tena ya-a ka-ka asütsü. Alima nung nungtuko Foot ball Club-temi tena ya sen dollar aika agi alizüker. Surabangla, tena tetsüng temupo yabo tangar dang nungi balaka alakteta "Super Giant Foot" aden asü koda...??? ta khen-khenbo shisadanger. Aji oda, asenoki kanga junga shisadanga, item ajak ya tanga kecha agi masü, saka pei dak aketba sempet tamshi shia amshiba, bendanga agüja, nendak-nentaka, meranga inyakba aser taküm asüngteta litetba agi iba jenjang tashi tongtet...ta asadangteter. Ajak dak alaka, asayar taküm kaji achi-ajemba nung azüoka libaliro ajak nung asüngteta alitsüla. Aji oda, linuk ka nung asayar mongin adoktsübaji asayatem-ia meranga asayatsüla, saka ano Sorkar-ia inyaktsü shilem tuluka lir. Asayar mongin adoktsü atema 'Stadium & Infrustructures' kanga tongtipang lir. Anungji Sokar-i rongsen indok mesasai iba nungji temulong agütsütsüla. Asen dang nungi tesu State anguba Manipur State nungbo National Games dena ayongzüka asayatetsüsa Stadium & Infrucstructures peria yanglua lir. Ajisüaka, asen Naga lima nungbo tang tashi District shia nung Stadium ka-ka ta yanglua makaba ya kanga tesasatsüka lir. Ano Sorkar-i National & International Level tashi nung Medal angur nembo senpet tajung agütsütsüla, aser kokrabang sorkar mapa-a agütsütsüla. Ano sempet keta liaka, International level tashi asayai aotsüsa rongsen makar nembo, Sorkar-i senotsü teyari-a agütsütsüla. Aji oda, saisapong nung tangar menepa ajungkettsü asoshi Sorkar teinyaktsü shilem tuluka lir ta angateter. Tang asen Naga lima nunga Sovima nung Crikete Stadium tajung ka yanglua akaba agi North-East nungi asayatem arua Tournament asayatetsüsa renemtetba atema asen yimsusurtem dang pelar. Aji oda, tanga Field nunga ibala mesukba Stadium & Infrustructures peria akatsüla. Sorkar-i District shia nung Stadium tajung ka-kabo yanglutsü sentong alitsüla. s Aser Dimapur nung Stadium ya nisung kahsetdak tesem ka mekümdaktsüi, tekaratiba nung renemtsü Sorkari temulong agütsütsüla. Aji oda, asen Naga nung lanurtem daka tangar dak aketba sempet tajung keta lir aser asenoka tangar amaaso-ajen agi tangar menepa asayatetsüsa temsua lir. Anungji asen Naga nung lanurtem-ia, sai-sapong nung mongin küma asayatsüla, aser sorkar mapa dang mebushi-i, sai-sapong nung temulong agütsütsüla aser asayar mongin kümer, alima nung nungtuko nisung akümtsüla aser pei kibong/taküm mesua alitsü merangtsüla.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Nicaragua sorkari Khristan putir 7 linük nungi meindok



Taküm July 26 nungi August 5 anogo tashi nung Nicaragua nung ketdangsertemi apuba Khristan putir tenet noksa nung angur. Parnok ajak linük nungi meindoka Vatican-i yokogo.

August 11, 2024: Tawa Nicaragua linük nung apuba Khristan putir tenet linük nungi meindoka Rome-i yokogo; iba linük nung Tir, Daniel Ortega yimsüsüba kübok ketdangsertemi Arogo aser Arogo nung lenirtem anema inyaker.

Matagalpa Diocese nungi putir tenetji National Police-i apu.

Taküm küm tejaklen-a sorkar ketdangsertemi Bishop Rolando Álvarez densema putir aika linük nungi meindoka liasü.

Bodhbarnü Khristan putir tenetji Nicaragua nungi apusoba sülen Brihostibarnü Vatican tonga ogo. 2022 küm October ita nungi tenzüka tang tashi nung Nicaragua sorkari telok balala pongu nungi putirtem aika linük nungi meindokogo.

Putirtemji house arrest asüba sülen National Inter-Diocesan Seminary nung yua liasü aser iba nungjagi linük nungi meindok.

Tang meindokba putir tenet nungjagi anabo Matagalpa diocese nung tongti lenir ana-René Vega Matamoros aser Edgard Sacasa na lir. Tenaprongla August 1, 2024 nü pua liasü.

Tanünga putirtemji Immaculate Conception of María de Sebáco Church nungi Marlon Velázquez, Jairo Pravia aser Vicar Víctor Godoy nung, Franciscan Friar Silvio José Romero aser Santa María de Guadalupe Church nungi Harvin Tórriz nung lir. Parnok ajak Hombarnü pua liasü.

Ortega yimsüsüba anema Arogo lenirtemi ola adokba sülen nungi ketdangsertemi Catholic Church aser Arogo lenirtem anema inyaker.

Sandinista National Liberation Front sorkar tetuyuba nung police-i Tenla kitem nungi putirtem apuba sülen linük nungi meindoker.

Tawa July 27 nüa arrshi küm 80 putir, Frutos Valle pua liasü saka pabo chiokogo.

August ita tetenzüklena ketdangsertemi Matagalpa

nung Arogo lenirtem aika puogo. Sorkari Arogo anema inyakba atema alima linüktem aikati Nicaragua sorkar aitsüba mapang ka nung maneni Khristan putirtem aika meindokogo.

Christian Solidarity Worldwide (CSW) Tir, Mervyn Thomas-i, yimsü temeden anema putirtem apuba ta tim masü, ta shia alima linüktem dang Tir, Ortega administration anema inyaksüla, ta tayongzükba agütsü.

Ano külen Pontifical Mission Societies USA-ia Nicaragua nung Arogo lenirtem taküm kümzüka alitsü atema sarasademjang, ta mepishia metetdaksüogo.

Parnoki sangdong ka ajanga, "Tang ama tayongzükba tulu aliba mapang ka nung asenoki longjemer Nicaragua nung Arogo atema sarasademtsütsüji kanga tongtibang. Asenoki longjemer putirtem, deacon tem aser Arogo lenirtem atema sarasademtsüdi, kechiyong reshikangshi liaka parnoki pei tamang jenjang nungi masetshir. Asenoki sarasademtsüba ajanga parnoki tesünep angutsü aser iba tongbang nung parnok kija masü sapa parnok pusemertem-a lir ta parnoki metettsü," ta metetdaksü.

Taküm January ita nunga putir Álvarez densema Khristan lenirtem aika chiok saka Rome-i yokogo. Arogoi Catholic Arogo anema inyakba atema Alvarez-i sorkar aitsüba sülen ketdangsertemi pa apu. Yaküm February ita nung pa küm 26 tepuokdak ayutsü obendang agüja liasü. Linük telongjem anema pai inyaker, ta pa aija liasü.

Tesüiba küm ishika tsünga Nicaragua nungi Khristan lenir 200 shi jenogo mesüra meindokogo. Khristan melungtet telok-Open Doors-ia 2018 küm nungi tenzüka iba linük nung Khristantem reshikangshiba osang mapang shia sangdonger.

2018 küm sorkari Khristan lenirtem aika apu, Khristan

kakettem apu aser Khristan schools, TV stations aser charity telok aika anenja liasü.

Iba linük temzüng kübok Arogo lenirtem ya kiralongrartem, ta sangdongba sülen sorkari Arogo rongsenkettzüng nunga amoushitsü nükjidong nung inyaker.

Republican, Robert Aderholt leniba nung Congress züngsem 58-ia shidi ka ajanga Nicaraguan ambassador den linük nung yimsü temeden anema inyakba tebilemtsü lemsatepogo.

U.S. State Department-i Nicaragua linük ya Country of Particular Concern (CPC) linüktem list nung züngoka lir.

US State Department-isa, Nicaragua nung sorkari Arogo anema inyakba ajanga Evangelical Khristantem-a kongshir, ta metetdaksü.

Tir, Ortega-i, 2018 küm nüburtemi longkak aitba aser pa Tir menden nungi atsüngdoktsü merangba nung Khristan putirtemi shilem agiogo, ta tai tonglokja liasü, iba mapang nungjagi tenzüka iba linük nung Arogo anema inyaker.

Tamalen sorkari Vatican den aiben tongtepratepa jembiba sülen Khristan putirtem mapang shia chioker saka parnok ajak Vatican-i aotsü atema tezüngzüktep agidaksür.

Tir Ortega-i yaküm February ita nunga tepuokdak alir 222 United States-i yoka liasü. US sorkar den tezüngzüktep ka agiba sülen parnok chiok saka US-i yok aser parnok senso temeden agiena liasü.

2018 küm nüburtemi Ortega Tir menden nungi anentsü takhangba agüja longkak aitba sülen nungi sorkari parnok anema ola adokertem aser Arogo lenirtem anema inyaker tenzüka liasü.

Nicaragua nung Ortega-i aniba Sandinista National Liberation Front sorkari Mother Teresa's charity densema melungtet telok 3,000 dak tema anentsüogo.

ANO GO ABEN TSÜNGREM DEN

TSÜNGREMER ASAMEYANG

Ni ne nem tenüngsang agütsütsü; kechiyong ni tetsübuttsüka aser tesüngmangtsüka yanglua lir, ne mapatem tesüngmangtsü; aser aji kü nelai shitak junga metet. T.Ken 139:14

Tsüngremi meimchirji tesüngmangtsü ama aser pa mesükba nung tetsür aser tebur yanglu. Aser soyapokya jenti rena jangratema alitsü jenjang agütsü. Ano iba den teyangluba ajak timi ketanga süa reprang teinyaktsü nungloktsü. Aser Tsüngremi teyangluba ajak aser miemchirtem tebur junga nungdak aser nükjidong balala asoshi yanglu. Yerimiai Tsüngremi pa ainkar asütsü shimba mangatet, Tsüngremi pa den jembia, "Ni na nu menden nung meyangludang na meteta liasü aser na masodang yongi ni na meshiteta yutsü: kintem dangi ainkar ka asütsü ni na shimtet." Yerimiai 1:5 Tsüngremer sentongji meimchir shisatsü kisüngi merajemteter aser masadangteter. Tsüngremi tajabaji tematiba tajaba, aser pa temeimji kecha tena masatangtet. Pai jenjang agütsübaji tesüngmangtsü ka nung nisung shiaji yanglua lir.

Temeimbatem Tsüngremer jenjang ulura asenok taküm shia nem agüja lir. Tsüngrem tenüngsang pa temeim tali angateta pa den lia pai nungloktsüba inyaker ta ayongzükter. Amen

Benue State nung Ayati yimdak Khristan 50 tepset

August 11, 2024: August 08, 2024 nü Nigeria nung Benue state kübok Khristan yimtsüng-Ayati yim amakdang Khristan 50 tepsetogo.

Osang angazükba agi, August 08, 2024 nikongdang 5:00 ako meta Fulani Muslim nung aser ozüng alema inyaker telok ka na senteper Khristan yimji amak.

Osangbener den jembidang yimdaklir, Tivta Samuel-i, "Fulani Muslim nungertemi Ayati yimdak Khristan 50 dak tema tepsetogo," ta metetdaksü.

Ozüng alema inyakertem jagi yimdaklirtem meyong aliji Fulani Muslim nungertem dang ayok, aser iba nungjagi mangatetep adoka liasü.

Yangji alir kati, Fulani Muslim nungertem jagi Khristantem meyong alu nung kiset shiruru chiyimdaksüba agi Khristantem sorkar ketdangsertem nem tashishiba ken o agüja liasü.

"Iba sülen sorkari security

sepaitem yoka Fulani telokji meindokba den külemi parnok meyong sükitem raksatsüba agi Fulani Muslim nungertemji kanga jashia liasü.

Security sepaitem jagi Fulani telokji meindokyonga parnoki mapang ajak nung security magütsütet, ibayongji sepaitem malidang parnok arua Khristantem amak.

July 21 nüa Ukum nung Fulani teloki Sankera yim amakdang Khristan asem tepseta liasü.

Nigeria ya alima nung Khristantem alitsü linük tamajungtiba 50 rongnung densema lir. 2022 küm October 1 nungi 2023 küm September 30 anogo tashi nung iba linük nung Khristan 4,118 tepsetogo, ta Open Doors' 2024 World Watch List report ajanga metetdaksü. Alima nung Khristantem puer aoba tatalokba teimtiba aliba linük-a Nigeria lir. Iba linük nung telok balalai Khristantem puser aoba tatalokba 3,300 lir.

AO OSHI ANGAZÜKDAK: TANÜ ANGAZÜKTSÜBA OJANG



Talep

(n) telong ka küma alepba (package)

* Ni dokan nung metsü talep ana ali.

Taleptatsünger

(n) nokinketer, mangkoleper (war hero)

* Taleptatsünger kin nungi tasü tait nisung adoker.

OLONG PAITEP # 6893

1				2				3		4
5		6								
						7				
8										
										9
		10				11				
				12				13		
14										
						15				
16										

TIPILEN	LANGTSÜNGLEN
2. Auo nung chiyongsü asenba	1. Lenmang
5. Mangyimba mapang	2. Aor kidong ka tenüng
7. O lamendakdak	3. Tenarong maten
8. Pei dak malangba	4. A _ _ _ g
10. Juli	6. Mopung apodoka
12. Sen ayudak	9. Tonglipang tagitsü
14. Tenük agi ajitet	10. Menungra bilem
15. Tamajung aküm	11. Aiür
16. Apuso	13. S _ _ _ k
	14. T _ _ _ r

OLONG PAITEP # 6892 TELANGZÜBA

TIPILEN :	LANGTSÜNGLEN :
1. Yiar, 3. Tesola, 7. Yimra,	1. Yimti, 2. Amen, 4. Shiner,
8. Tangar, 9. Peria, 10. Tanur,	5. Alaka, 6. Satan, 9. Putet,
11. Tasen, 13. Lemjem,	10. Tembar, 11. Tatok,
15. Tambu, 16. Khuret,	12. Amang, 14. Jala.
17. Sang.	

NAI-A YA METETTER MA



Pakistan nunger Arshad Nadeem-i August 8, 2024 nü Paris Olympics 2024 nung javelin throw nung mezüngbuba jenjang ngutetogo. Pai 92.97 metres yokteta Olympic Record nung züngsemogo. Tang tashi nung javelin throw nung World Record yanglubaji Czech Republic nunger Jan Zelezny lir. 1996 nung pai 98.48 metres yokteta alima otsü yanglutet.

Best javelin throws of all time

- Jan Zelezny (CZE) - 98.48 mtrs
- Johannes Vetter (GER) - 97.76 mtrs
- Thomas Rohler (GER) - 93.90 mtrs
- Aki Parviainen (FIN) - 93.09 mtrs
- Andersen Peters (GRE) - 93.03 mtrs
- Arshad Nadeem (PAK) - 92.97 mtrs
- Julius Yego (KEN) - 92.72 mtrs
- Sergey Makarov (RUS) - 92.61 mtrs
- Raymond Hecht (GER) - 92.60 mtrs

Karimganj nung "Bangladesh Chalo" campaign agi

Guwahati, August 11, 2024 (Agencies): August 11, 2024 nü Assam kübok Karimganj nung Hindu Suraksha Bahini züngsemtemi lungkak aitba sentong tulu ka ayongzüka agiogo.



Bangladesh nung nübo agi tangar memeneprtem reshikangshiba anema parnoki iba sentong agi.

Karimganj College nungi "Bangladesh Chalo" campaign tenzüik aser iba nung nisung meyrjang ka shi aden.

Lungkak aitertemi placards aser banners amer yimdong sema jaja. Ajisüaka Santar Bazaar point nung police-i parnok noktang.

Iba sentong agiba ajanga national highway nung traffic nung timtem ajuru saka ozüing amertemi tensa azüok aser lungkak aitertemi timi

senshidaktsü.

Karimganj district administration-i tanü tesem balala nung barricades ayu aser tensa meraksatsü atema security akangshi.

Karimganj-i Bangladesh den kilometre 110 agi arrtsütepa lir aser ano ayong nunga kilometre 4 agi artsüa lir.

"Karimganj nung river

boundary nung tenokdangba kecha yanglua mali. Ajisüaka tanüngba arrtsü nung jara enoka lir" ta District Commissioner Mridul Yadav-i ashi.

Karimganj kübok Sutarkandi nung Integrated Check Post (ICP) ka lir aser iba ta Bangladesh den shishilembatsü atema lapokba lir.

Manipur nung anentsüh ajanga Imphal-Silchar highway anenbang

Imphal, August 11, 2024 (Agencies): Manipur kübok Noney district nung tzünglu kanga aruba ajanga tesem aika nung anentsüh alua lir aser Imphal-Silchar highway anenbanga lir.

ako meta anentsüh aluba ajanga khu abenba truck gari 400 shi highway nung anendena liasü.

Iba atema National Highways & Infrastructure Development Corporation Ltd. (NHIDCL) indang koltem bener oa lenmang lapoktsü asoshi mapa inyakdar.

Tzünglu kanga aruba ajanga Noney district nung timtem aika ajurur aser anentsüh aliba

ajanga ki 8 raksatsü.

Yimdaklirtemi sorkar dang parnok alidak ali anenoka aiba asadangtsü aser tarutsü nung lendong nungi jenbua alitsü atema mapa inyaktsü teyari meshiogo.

Rengpang Part 3 (Kiangbiangpang) Nungba, Rongdai, Shantikhunou, Siblong, Nungkao aser Taodaijang yimtsüngtem nung anentsüh ajanga kiojen aika raksatsüogo.

Olemtep nung adenba ULFA-i AJP nungita yaritsü: Lurinjyoti Gogoi

Digboi, August 11, 2024 (Agencies): ULFA pro-talk faction-i Assamese nunger aser Assam state atema Asom Jatiya Parishad (AJP) pusema nungittsü nangzükogo ta AJP president Lurinjyoti Gogoi-i ashi.

Assamese nungeri AJP pusemba sayuogo. Iba ya state kümzüka ayutsü aser nisung ajak külemi liyonga aotsü tangatetba nung inyakba lir ta Gogoi-i ashi.

Deobarnep Patkai Resort, Digboi nung Lurinjyoti Gogoi-i ULFA tanishirtem den senden ka amen aser iba sülen Digboi Luit Silpi Samaj nung 'formal merger' sentong nung shilem agi.

Digboi nung sentong agidang Tinsukia district kübok tesem balala nungi nisungtem AJP nung aden.

Olemtep nung adenba ULFA telok dang masü saka

Tanü AJP nung adenertem rongnung lanur lennir aser AGP State Vice President Diganta Saikia'er jabaso Gitartho Saikia dena lir.

Iba atema osangbenertemi BJP MLA Suren Phukan den osang agitepdang pai nisungtem AJP nung adenbaji kecha masü ta ashi.

"Ozü constituency nung BJP akangakanga lir aser nija tajangzük atema political party melenshirtem aitsür" ta Phukan-i ashi.

"Assam nungeri BJP shimer aser Dr. Himanta Biswa Sarma ama tanishir tajung kati dang state nung alirtem taginüba tongtsütsü" ta paisa ashi.



Tripura kübok Dhalai district nung police-i Rs 2.5 crore jenjang drugs den nisung ka apuba sülen agiba noksa angur. Ambassa Police Station nung ketdangsürtemi osang tejanga ka angazükba sülen mita atadang Manu nungi Agartala leni aruba Bolero gari (TR01F2938) ka nung Yaba süngjang 80,000 aser brown sugar gram 539 bena aliba apu. Iba dak sendakba nung nisung ka puogo ta Dhalai District Superintendent of Police Avinash Rai-i ashi. Chief Minister Dr. Manik Saha-i tenzüka 'Nasha Mukta Tripura' kübok war against drugs nung iba ya takok tulu ka lir ta paisa ashi.

Mulungnen O

"Kechiyong asenok taküm lira, asenok Kibuba atema taküm alir, aser asenok süra, asenok Kibuba meyong." - Rom 14:8



Onoki teti meima aliba tsürabur Obala K. N. Temjen Jamir (Mongsenyimti), August 3, 2024 nü alima nungi piladang kidangkiyongertem, anük-apang aser yimtsür-yimertemi anir ana aser talang nungi kidang-kimang aser pur-medemertem shirnokisa sarasadem den nübu aser rongsen tulu tenla-a yaritepogo, nenok ajak dang ozüi tsüngdong mejeteta arua pelaba meshitetaka iba osang ajanga ozüi mulungnena pelaba nenok ajak den lemsateper.

Tongtibangsa, ozü asükhu mapang lenla balala nung yariteper Mongsenyimti Compound Baptist Arogo; Mongsenyimti Baptist Arogo; Unity Ao Baptist Arogo, Chümoukedima; Jorhat Ao Baptist Arogo; Eastern Theological College, Jorhat; Mokokchung District Pensioners' Association; Mongsenyimti Village Council nenok ajak dang pelaba lemsateper.

Maneni ozü mulungzürep tia nung alidang ana aser talang nungi lokti tentet balala den kija aserkibongtem shirnokisa asü osang angazükli nungi lepkhumong tepiyong nungita yaritepa aruogo nenokmapa tajung mamadoktsü.

Meimchir tangolabo tazungla saka Taküm Tsüngremi nenok mapa mamadoktsü aser pai nenok ajakmoatsütsü, aji ozü kinünger tamang aser sarasadem.

- Temeim Kinungtsü, Jala-jabasotem, Semchirtem aser Kinungertem

MENUNGRA BILEMTETTER



Obala Asür. A Imlibenba Jamir, Chuchuyimlang (12-08-2023)

Nai onok toktsür or tanü küm ka abensar. Ne temeim aser mapa tajungtem onoki kodanga mamar, onoki na munguaka onok mulungjang nung na teti lir.

- Nai teti meima aliba temeim kinungtsü, chirnurtem, semchirtem aser kinungertem.

OFFICE OF THE UNGMA COUNCIL MULUNGNEN O

Mr & Mrs. Burtemsu Jamir (Akhoya), par kibong Ungma nung alidang 2nd Aug. 2024 tia maka Dikhu ayong nung tzü ajanga taküm samatsür pa mang 5th Aug. 2024 anogo ngutetba tashi nung Mokokchung District Administration/SDRF/Police Dept./Mokokchung Head D.B aser par telok/O.M. Longsa Council/Chubayimkum Council/Meyilong Council/Moalenden Council/Mokokchung Village Council/Chuchuyimpang Council/Longmisa Council/Alisapur Council/E.N.P.O Mokokchung Unit/Artang ward/12 Assam Rifle Mokokchung. Item dak alaka lokti tentet balala aser nija shirnokisa sarasadem, nübu, rongsen, shisatsü agi yariogo, nenok temeim mapa tajung Tsüngremi moajangma ta Ungma Council ajanga pelaba metetdaksür.

Iba dak alakteta rongsen tenlar kar yamai;

- | | | |
|-------------------------|---|--------------|
| 1. Longsa Council | - | Rs. 10,000/- |
| 2. Chubayimkum Council | - | Rs. 2000/- |
| 3. Meyilong Council | - | Rs. 2000/- |
| 4. Moalenden Council | - | Rs. 2000/- |
| 5. Ongpangkong Mungdang | - | Rs. 5000/- |
| 6. Artang Ward | - | Rs. 5000/- |

**Sd/-
R. Nungshilepten Tatar,
Chairman**

**Sd/-
Takoyanger Tatar
Secretary**

Gaza nung civilian tali süogo: Kamala Harris

Phoenix, Luroi/August 11 (Agencies): Honibarnü Gaza nung school ki ka nung Israel-i tayimtsü amshia amakba nung civilian aika takum samaba asoshi US Vice-President Kamala Harris-i aitsü.

Palestine nunger tesem balala nungi adenshia jenoka aliba ki ka nung nisung 70 dak tema tepset, ta mozüki ka indang director-i ashi.

Iba lendong atalokba sülen Harris-i civilian ano kanga aika süogo ta ashi aser White House-i ayongzüka ama pua alirtem chiochtsü aser ceasefire atema tezüngzüktep yanglutsü ayongzüka liasü.

Israel mitkar indang odongtar kati al-Taba'een school ya Hamas aser Islamic Jihad military facility ama liasü ta ashir, koba Hamas-i magizüker.

Phoenix, Arizona nung nübuyim sentong ka nung jembidang, Hamas anema nokdaksü Israel dak temeden lir, saka civilian takum samatsüba nungi paidoktsü tongtipang teinyaktsü lir ta ashi.

Honibarnü tayimtsü amshia amakaba ya Western aser regional powers temi aitsüogo aser Israel-i Gaza nung ceasefire alitsü mesüra rara tatem kati arutsü tejangraba mali, ta Egypt-i ashi.

School ki maker ghonda ishika tsüngta asür 70 shi jangjatetogo aser aika temang kanga mejungi raksaba ajanga mejangjateti lir, ta al-Ahli Hospital tekolak Fadl Na'em-i ashi.

Israel mitkari al-Taba'een school nung Hamas kiralongrar indang control centre ka nung mezüng-mezünga amak ta ashi.

Iba tesem nung Hamas aser Islamic Jihad kiralongrar 19 shi takum samatsüogo, ta Israel Defense Forces (IDF) aser Israeli Security Agency sangdong ka nung ashi.

Iba Taba'eem school amakdang yangji Islamic Jihad indang Central Camps Brigade commander, Ashraf Juda liasü ta itdangter balalai kuli sayu, ta IDF odongtar Rear Adm Daniel Hagari-i ashi.

Ajisüaka commander ya



Kamala Harris

tepsset asü masüar ano mejangja ta pai ashi.

Hamas ketdangsür temi asü-amar osang sangdongba ya IDF ket nung aliba osang, injang-bomb amshiba aser tejangja amakba den meputeper, ta Israel odongtari ashi.

Iba school amakba ya Israel-i Palestine nübur samatsütsü raraba nung tesempatsü mapa tamajung aser lendong tuluba kumdaktsüba lir, ta Hamas-i ashi.

US National Security Council odongtar Sean Savett-i ashiba agi, Hamas-i school tem amshia par züngsemtem adenshir aser item tesemtem nungi operation agir.

"Ajisüaka Israel-ia civilian nem timtem agütsüba ajemtsü asoshi mera agitsüla ta onoki nenshia ashir," ta pai ashi.

Taoba hopta ishika tsüngta Israel-i Gaza nung iba amala tesem aika makogo.

United Nations ajanga ashiba agi, Gaza nung school buildings 564 aliba nungi July 6 tashinung 477 nung indang-indanga amak mesüra raksatsüogo, aser iba sülena ter dak tem nung makogo.

Al-Taba'een school nungya nisung 1,000 dak tema liasü aser tawa Israel army temi Beit Hanoun nung alirtem dang pei kidang nungi ainshitsü totuyuba agütsüba sülen nisung aika iba tesemi arua liasü.

Iba building ya mosque ama liasü aser Israel-i anepbong

sarasadamba mapang amak, ta tenük kuli alirtemi ashir.

Iba school anasa alir kaketshir Jaafar Taha-i osangbener dang ashiba agi, bomb pokloktsüba sülen nisung ola adoka ayimtenba aser jeptepba angashi.

"Onok kumzükarang, onok kumzükarang ta parnok ayimtena liasü," ta pai ashi.

"Iba tesem ya tetsübotsüka liasü. Tesem ajaklen temang shilem prokshia liasü aser azü agi jara sünger liasü."

"School ajanga nung civilian, tanurtem, tetsütem aser kibongtem agi sünga liasü, shirnok school mesüra mosque ama tazüng aliba tesem nung jenoka liasü," ta UNICEF indang odongtar Salim Oweis-i ashi.

Hamas temi civilian indang ki o jen amshia sentong yanglur amaker aser iba yongji mozüki aser school tem amaker, ta Israel-i ashir, koba international law kübok wazüka ayutsü shia lir.

Hamas-i item taitüsüba khenyongi magizüker.

Hamas-i anir prangbong bena alir temi October 7 nü Israel amakdang nisung 1,200 shi tepseter nisung 251 pua bener Gaza-i ao.

Iba yongji Israel mitkari Gaza nung amak tenzüka tang iba rara ya adok. Israel-i tang tashinung Palestine nunger 39,790 tepsetogo, ta Gaza nung Hamas meyong health ministry ajanga ashir.

Russia-i arrtsü nungi nüburtem aniener

Moscow, Luchii/August 11 (Agencies): Ukraine-i arrtsü adener amakba maziüktetba sülen Russia-i ashiba agi, parnoki arrtsü nung alir nisung meyirejang aika anienogo aser meyiper Ukraine nunger sepaitem amak tenzüko.

Kasa mapang nung Moscow-i, Russia anüolen Kursk tesem nung raratepba ajanga nuclear power plant ka lendongbang nung toktsür, ta tekümdangtsü metetdaksüogo.

Ukraine nunger sepaitemi Mongolbar anpedang nungi Russia-i amokbanger aliba tesemtem amak tenzü, koba küm anaser tesadang rara aruba nung Kyiv asoshi takok tulutiba asütsü ta züngshir.

Ukraine nunger sepaitemi kilometer aika atsüngaogo aser iba ajanga Russia nunger sepaitem hadir talila bushia aotsüsa aküm. Ajisüaka telok anapronglai osang tejangja magütsü.

Local ketdangsürtemi raraba tesem anasa aliba jila aser yimtsüngtem nungi nüburtem aninba indang osang metetdaksüogo.

"Nisung 76,000 dak tema tekümzüka tesem bushia anirogo," ta regional emergency situations ministry ketdangsürtemi Honibarnü ashiba state meyong TASS news agency sangdong ka ajanga metetdaksü.

Jongdak teyari balala arrtsüleri bener otsogo aser rara nungi ajenertem atema linük yimtiba Moscow-i aotsü asoshi train talila yokogo.

"Rara onok dangi aruogo," ta

tetsür kati AFP dang Hokolbarnü Moscow train station tonga aruba sülen ashi.

Kyiv-i iba inyakyim dak sendakba nung ola madoki liasü aser Ukraine tir Volodymyr Zelensky-ia anogo ishika iba rara dak sendakba nung indang indanga mejembi arudar.

Ajisüaka Honibarnü nikongtsütsü Zelensky-i, army chief Oleksandr Syrsky-i ashiba lephsia frontline nung asenok amakterem litsü agiyonga odar, ta ashi.

Rara nung shilem agiba sepaitem nem tenüngsang agüja pai, "ochi obendang bener arutsütetsü ta Ukraine-i kuli agütsüdar aser nüngdakba ama nongshidar," ta ashi.

Russia indang army-ia, Honibarnü sangdong ka ajanga parnok Ukraine nunger sepaitem den anogo pongububa radar, ta metetdaksü.

Russia indang national anti-terrorism committee-i Hokolbarnü ashiba agi, parnoki Belgorod, Bryansk aser Kursk nung nüburtem kümzüka toktsütsü atema counter-terror operations ka tenzüko.

Item tesem nung gari senzisenpong nokdang, phone call tem asadanga litettsü, tesemtem no-go zones ta sangdongogo, checkpoints tem amenokogo aser tongtibang infrastructure tem amenoka aliba tesemtem nung security akangshiogo.

Kasa mapang nung Ukraine-ia, parnoki Kursk den arrtsü nung aliba Sumy tesem nungi nisung 20,000 shi aninogo, ta ashi.

Paris Olympics nung India nunger asayartemi medal 6 angu



Paris Olympics nung India nunger asayartemi medal 6 angubatem noksa nung angur.

Luroi/August 11, 2024 (Agencies): 2024 Paris Olympics nung India nunger asayartemi medal trok ngur tembangogo. Parnoki silver ka aser bronze medal pongu ngua liasü.

India nunger asayartem rongnungi Manu Bhaker-i bronze medal ana ngua, India tsürtem rongnungi shooting asaya nung mezüngbuba medal angu aser Olympics ka nung India nunger rongnungi medal ana anguba mezüngbuba asayar aküm.

Manu tetsür 10m air pistol final atema qualify asüba mapang la ya Athens 2004 küm sülen India tsürtem rongnungi shooting nung final atongba mezüngbuba asayar aküm. Iba asaya nung lai bronze medal angu aser ano tarep temeyoktep asaya nung Sarabjot Singh den külemi bronze medal ka ngua liasü.

Swapnil Kusale-ia tebur 50m rifle 3 positions nung bronze medal ka angu, koba linük nungi iba asaya nung mezüngbuba

medal anguba liasü. Kusale-i anguba medal densema shooter temi medal asem angu, koba Olympics nung shooter temi medal timtiba anguba liasü.

Kasa mapang nung India tebur hockey team-ia Olympics anabuba atonga bronze medal nguogo. Hamrnapreet Singh-i aniba team yagi bronze medal atema asayaba asaya nung Spain team goal 2-1 agi koka liasü. India hockey team-i tang tashi nung Olympics nung medal 13buba nguogo.

Neeraj Chopra, shibai Tokyo Olympics nung otsü tasen ka yanglua India nunger athletics asayartem rongnungi mezüngbuba medal (gold) ngua liasü, pai taküma javelin asaya nung silver medal nguogo.

Maneni Aman Sehrawat-i, 57kg men's freestyle wrestling nung bronze medal ka anguba sülen pa India nunger asayartem rongnung Olympic nung medal ka anguba asayar tanobusang kümogo. Pai arishi küm 21 aser anogo 24buba nung iba medal

ngua liasü.

Bhaker-i, ano tetsür 25m air pistol event nunga medal ka ngur lila saka tera agi alizüng metongteti liasü. Shooters Arjun Babuta-i tebur 10m air pistol aser Anantjeet Singh Naruka o Maheshwari Chauhan nati mixed skeet event nung tera agi dang medal mongui pezübuba nung tembang.

Archers Dhiraj Bommadevara aser Ankita Bhakat nata tarep temeyoktep asaya nung pezübuba nung tembanga liasü.

Maneni badminton asaya nung Lakshya Sen-a pezübuba nung aser Weightlifter Mirabai Chanu-a tetsür 49kg category nung pezübuba nung tembanga liasü.

Archery, athletics, badminton, boxing, equestrian, golf, hockey, judo, rowing, sailing, shooting, swimming, wrestling, table tennis aser tennis ta asaya 16 nung India nunger asayar 117-i taküm Olympics nung shilem agiogo.

Tottenham-i Dominic Solanke euro million 65 agi alizükogo

Luroi/August 11, 2024 (Agencies): Premier League season tasenba atema attacking akangshitsü asoshi Tottenham-i, Bournemouth nungi striker Dominic Solanke pound million 65 agi alizükogo.

Arishi küm 26 tain asayar yagi küm trok atema tenangzüktepba ka yangluogo aser pa pound million 55 agi alizükogo aser add-ons pound million 10 asütsü.

Solanke, shiba mezüng Chelsea nungi asaya tenzüka liasü pa Liverpool nungi mapang tatsüka asayaba sülen 2019 küm Bournemouth-i ao aser 2023/24 season nung pai kanga junga asaya Premier League nung goal 19 idakja liasü.

Tottenham-i taah ajunga agütsüra Solanke ya club-i sen timtiba agi aliba asayar akümtsü.

Ita 12 tejakdang Harry Kane-i club toktsür Bayern Munich-i aoba mapang Spurs puri pa alizüktsü bilema liasü



Dominic Solanke

saka malizük.

Taoba season Premier League nung pongububa nung tembangba sülen Ange Postecoglou-i aniba team ya takümbo Champions League nung asayatetsü asoshi Solanke-i teyari agütsütsü yimla alitsü.

Bournemouth kibur Bill Foley-i taküm Solanke indang contract nung release clause

pound million 65 densema lir ta shiogo aser tang pa ayokba ya Bournemouth puri asayar ka sen tasaktiba agi ayokba asütsü. Parnoki 2020 küm Nathan Ake pound million 40 agi Manchester City dang yoker liasü.

"Onoki nungi kanga junga asayaba aser talisa 2023-24 season nung kanga junga asayaba sülen Tottenham amala club kati pa alizüktsü tejangraba sayuba ya kecha taoksatsüka masü," ta Bournemouth indang chief executive Neill Blake-i ashi.

"2019 küm club nung arua adenba sülen pai kanga meranga inyakba ajanga pa kanga renlokogo aser iba den AFC Bournemouth-i lanur asayartem nem sabang tajung agütsüba ajanga lir.

"Club puti otsü nung otsütsüsa Dominic yoktetba atema onok pelar aser par tarutsü takok nung aotsü atema AFC Bournemouth-i imlaja atar," ta paisa ashi.

Pakistan-i Nadeem nem tetushi agütsütsü

Luroi/August 11, 2024 (Agencies): Pakistan-i, athlete Arshad Nadeem nem Hilal-e-Imtiaz agütsütsü, koba linük nung tematiba tetushi agütsübatem rongnung tanabuba lir. Paris Olympics nung javelin throw asaya nung pai gold medal ka anguba sülen tang iba tetushi agütsütsü.

Sorkari 'Azm-e-Istehkam' (commitment to stability) ta nungja agütsür commemorative stamp ka yanglutsütsü atema tetuyuba agütsüogo, koba taruba hopta 77buba Independence Day amungba mapang sayatsü.


Arishi küm 27 tain asayar yagi tebur javelin throw asaya nung nület meter 92.97 tsüa Olympic record (90.57) tasen ka yanglu aser gold medal ngua liasü. Nadeem-i gold medal ka anguba ya Pakistan nunger asayartemi küm 40 tsüngda mezüngbuba gold medal anguba liasü.

Tir Asif Ali Zardari-i tetuyuba agütsüba sülen pa nem iba naroküm agütsütsü asoshi pa indang office-i Cabinet Division nem shiti ka agütsüogo.

"Arshad Nadeem-i kanga junga asayaba ajanga alima matsüngdang linük kanga nema dangdaksüogo. Pai takok tajung anguba ya linük asoshi konang tetushi ka lir," ta tir Zardari-i shiti nung shia lir.

Iba civil award ya Nadeem nem tir-i ayongzüka sentong ka agiba mapang agütsütsü.

Kasa mapang nung Ato Kilonser Shehbaz Sharif-i, 'Azm-e-Istehkam' (commitment to stability) ta nungja agütsür pa nungdem nung stamp ya yanglutsütsü tetuyuba



Arshad Nadeem

agütsüogo, koba August 14 nü 77buba Pakistan Independence Day amungba mapang sayatsü.


Stamp indang design nung Nadeem indang noksaka aser Minar-e-Pakistan (national unity temaitsü) indang noksa keta alitsü.

Nadeem-i takok mangu tsüngda Pakistan-i Olympics nung nung khen danga gold medal ngur maliasü. Iba masü dang Mohammad Bashir-i wrestling nung bronze (1960) aser Hussain Shah-i boxing asaya nung bronze (1988) medal ngur liasü.

Paris nung takok tajung anguba sülen Nadeem nem Punjab province aser tanga provincial sorkar aser lokti tentetemi senpet balala güja arudar.

Punjab Chief Minister Maryam Nawaz-i Hokolbarnü sangdong ka ajanga senpet sen million 100; Pakistan Peoples Party indang Sindh sorkari sen million 50 aser Sukkur city mayor-i hon korang ka agütsütsü nangzükogo.

Brentford-i Carvalho atema pound 27.5m agütsütsü mulunga agizükogo



Fabio Carvalho

shilem 20 ajangzüktsü.

Carvalho ya Southampton puria alizükntüa liasü, saka parnoki pound million 15 yong pa alitsü asoshi benokba Liverpool-i magizük, kechiyong iba asayar teti atema ayoktsü asoshi jenjang ya parnoki aginüba dang nungi tajemba liasü.

Liverpool pur United States nung oa pre-season tour asayaba mapang arishi küm 21 tain asayar yagi kanga junga asayaogo aser pai Arsenal aser Manchester United na den asayaba mapanga goal idakja liasü.

Ajisüaka Euro 2024 aser Copa America na tembangba sülen Liverpool nungi teti asayartemi aika meyipa arur asünung pa team nungi asayatsü asoshi aibenbo maongka mangutsü ta bilemer.

Carvalho ya taoba season loan nung oa RB Leipzig aser Hull City nungi asayaogo aser iba mapang pa Tigers pur atema asaya 20 nung asaya aser iba mapang goal teku idakja liasü.

Luroi/August 11, 2024 (Agencies): Liverpool-i Brentford dang Fabio Carvalho pound million 27.5 den add-ons densema ayoktsü atema mulunga agizükogo.

Liverpool purisa iba tenangzüktepba nung shilem ka ama 17.5% sell-on clause ka asoshi sensaksemogo, koba initial fee pound million 20 shi atema asütsü ta amanger.

Liverpool-i Fabio Carvalho ya 2022 küm Fulham nungi pound million 5 yong alizü aser pa Brentford-i aoba ajanga Fulham pura tajangzük nungi

BILEMDANGANG

"Taginüba aser tenüngdakba bendangtetang."